

#### BAHAGIAN IV TATATERTIB LALULINTAS JALAN

Kebenaran bertulis bagi pelajar yang menyimpan, memiliki atau mempunyai kenderaan motor di dalam kampus.

36. (1) Seseorang pelajar yang bercadang untuk menyimpan, mempunyai dalam milikannya atau mempunyai kenderaan motor di dalam kampus hendaklah pada mulanya memohon dan memperoleh daripada Naib Canselor suatu kebenaran bertulis berkenaan dengan kenderaan motor itu; permohonan dan kebenaran bertulis itu hendaklah dalam apa-apa bentuk sebagaimana yang ditetapkan oleh Naib Canselor, tertakluk kepada subkaedah (2).
- (2) Permohonan bagi kebenaran itu hendaklah dibuat oleh pelajar secara bertulis dengan menyatakan perihal kenderaan motor itu dan hendaklah disertai dengan lesen kenderaan motor semasa dan polisi insuran pihak ketiga semasa dengan kenderaan motor itu dan lesen memandu yang sah berkenaan dengan pemohon itu.
- (3) Kebenaran Naib Canselor hendaklah dipamerkan pada bila-bila masa secara mudah dilihat di atas kenderaan motor.
- (4) Kebenaran itu hendaklah diperbaharui setiap tahun dan peruntukan subkaedah (1), (2) hendaklah terpakai *mutatis mutandis* bagi suatu permohonan untuk pembaharuan.
- (5) Naib Canselor boleh enggan memberi kebenaran atau membatalkan apa-apa kebenaran yang diberikan jika dia berpuas hati bahawa kenderaan atau pembatalan apa-apa kenderaan yang diberikan itu bukan untuk kepentingan Universiti bagi pelajar memegang kebenaran itu.

#### Daftar kenderaan motor pelajar

37. Naib Canselor hendaklah menyebabkan supaya disenggarakan suatu daftar bagi semua kenderaan motor yang disimpan, dimiliki atau mempunyai oleh pelajar dalam kampus dalam apa-apa bentuk yang difikirkan patut oleh Naib Canselor.

#### Had laju

38. Tiada pelajar boleh memandu kenderaan motor di dalam kampus dalam kelajuan lebih dari yang ditunjukkan oleh isyarat lalulintas.

#### Kenderaan motor hendaklah dipandu hanya di atas jalan raya

39. Tiada pelajar boleh memandu kenderaan motor di mana-mana tempat selain di bahagian jalan yang digunakan sebagai jalan laluan bagi kenderaan motor; khususnya, tiada kenderaan motor boleh dipandu oleh pelajar di atas laluan pejalan kaki, bahu jalan, tepi rumput, lorong jalan kaki, koridor, beranda, kaki lima, laman dalam atau dalam mana-mana bahagian mana-mana bangunan atau tempat lain samada di sisi jalan laluan atau selainnya, yang biasanya tidak dimaksudkan atau tidak disediakan secara khas untuk laluan kenderaan motor.

#### Meletak kereta secara menghalang

40. Tiada pelajar boleh meletak apa-apa kenderaan di mana-mana tempat atau dalam apa-apa cara yang menyebabkan bahaya, halangan atau kesulitan kepada mana-mana orang atau kenderaan motor lain.

### **Menggunakan ruang letak kereta yang diuntukkan**

41. Jika suatu ruang letak letak kenderaan diuntukkan bagi kenderaan motor tertentu tiada pelajar boleh meletakkan kenderaan motor lain dalam ruang letak kenderaan itu.

### **Membonceng**

42. (1) Seseorang pelajar yang memandu motosikal beroda dua tidak boleh membawa lebih dari satu orang di atas motosikal itu.

(2) Tiada pelajar boleh membawa seseorang di atas motosikal beroda dua melainkan orang itu duduk menunggang motosikal itu di belakang tempat duduk pemandu di atas tempat duduk yang direkabentuk dengan sempurna dan dipasang dengan kukuh pada motosikal itu.

(3) Seseorang pelajar tidak boleh membenarkan dirinya dibawa di atas motosikal beroda dua yang dipandu oleh seseorang, samada seseorang pelajar atau bukan, yang melanggar dengan subkaedah (1) atau (2).

### **Arahan dan isyarat lalu lintas**

43. Seseorang pelajar hendaklah mematuhi semua arahan lalulintas dan isyarat lalulintas.

### **Pengeluaran lesen memandu dan kad motosikal**

44. Mana-mana pelajar yang memandu atau yang menjaga atau mengawal sesebuah kenderaan motor hendaklah membawa bersamanya suatu lesen memandu yang sah yang dikeluarkan kepadanya dibawah Akta Pengangkutan Jalan 1987 (Akta 333) dan kad matrikulasinya dan hendaklah mengeluarkan lesen memandu atau kad matrikulasi untuk diperiksa oleh seseorang yang diberi kuasa apabila dikehendaki berbuat demikian.

### **Halangan kepada aliran lalulintas**

45. Seseorang pelajar tidak boleh berkelakuan dalam apa-apa cara, atau melakukan apa-apa perbuatan, yang menghalang atau mengganggu perjalanan lalulintas yang licin dan teratur di dalam kampus.

### **Perbuatan di dalam kampus yang adalah kesalahan di bawah Akta Pengangkutan Jalan 1987 sebagai kesalahan tata tertib**

46. (1) Seseorang pelajar melakukan suatu kesalahan tata tertib di bawah kaedah-kaedah ini jika dia melakukan apa-apa perbuatan di dalam kampus yang adalah suatu kesalahan di bawah Akta Pengangkutan Jalan 1987 atau mana-mana perundangan subsidiary yang dibuat di bawah Akta itu atau disifatkan telah dibuat di bawah akta itu.

(2) Maka hendaklah menjadi suatu pembelaan bagi apa-apa pertuduhan kesalahan tata tertib di bawah subkaedah (1) jika seseorang pelajar mengemukakan keterangan bahawa dia telah atau sedang dalam proses menghadapi tindakan di bawah Akta Pengangkutan Jalan 1987 atau mana-mana perundangan subsidiary yang dibuat di bawah akta itu atau disifatkan telah dibuat dibawah akta itu bagi kesalahan itu.

### **Hukuman tata tertib terus**

47. (1) Pihak berkuasa tata tertib boleh pada budi bicaranya, sebagai ganti mengambil prosiding tata tertib di bawah bahagian V, mengenakan hukuman tata tertib terus dengan amaran atau denda tidak melebihi lima puluh ringgit keatas mana-mana pelajar yang melakukan sesuatu kesalahan tata tertib di bawah bahagian ini dengan kehadiran atau pendapat pihak berkuasa tata tertib.

Dengan syarat bahawa sebelum apa-apa hukuman dikenakan keatas pelajar, pihak berkuasa tata tertib hendaklah memberitahunya tentang kesalahan tata tertib yang dilakukan olehnya dan memberinya satu peluang untuk membuat dengan serta merta, representasi lisan berkenaan dengan kesalahan itu.

(2) Setelah pengenaan hukuman yang disebut dalam subkaedah (1), pihak berkuasa tata tertib hendaklah dengan serta merta menyerahkan kepada pelajar satu notis bertulis tentang pengenaan hukuman itu dalam apa-apa bentuk yang diarahkan oleh Naib Canselor, dan jika hukuman yang dikenakan adalah suatu denda peruntukan kaedah 63 dan 64 hendaklah terpakai.